

Goibekokale

ELGETA / Barikua / 2005eko apirilaren 29a / 224. zenbakia

KOORDINATZAILEA: Irati Agirreazaldegia • Barrenkalea 33 BERGARA 20570 • Tel.: 943 76 03 97 • Faxa: 943 76 29 77 • Posta elektronikoa: goibekokale@golena.com • Lege gordailua: SS475/95

Jaietan ez da danborradarik izango Udala eta antolatzaileak bat etorri ez direlako

IRATI AGIRREAZALDEGI

Azoka Nagusiko jaiak gertatzen hasi dira dagoeneko eta aurten nobedadeak egongo dira. Danborradako antolatzaileak ez dira ados ipini Udalekoekin, beraz, aurten danborradarik ez egitea erabaki dute. Iaz urtebeterako egindako etena luzatu egingo da.

Danborrada antolatzen duen taldeak lan jarduna bertan behera lagatzea erabaki du aurten. Izan ere, "dagoeneko ez dago denborarik danborrada antolatzeko". Hori jakinarazi digu danborradaren bultzatzaile Josu De Vegak.

Iaz ez zen danborradarik izan jaietan. 2003ko danborradaren ostean, atsedena hartzea erabaki zuten eta ekitaldi berezi hori bi urtean behin egitea. Aurtengo asmoak, ordea, ez du aurrera egin. "Urte hasieran Udaletik galdetu ziguten zenbateko kostua duen danborrada antolatzeak eta guk jakinarazi genuen. Baina orain dela hamar bat egun jakinarazi ziguten ez dagoela dirurik, alkateak partida berezirik eman ezean danborradarako", esan digu De Vegak.



Orain dela bi urteko jaietan egin zuten azken aldiz danborrada.

HASERRE

Danborradaren bultzatzaileak haserre daude. "Urtariletik kulturako arduradunei gaiaren gainean berba egiteko nahia azaldu

diegu eta orain dela gutxira arte ez digute ezer garbi esan. Orain berandu da antolatzen hasteko. Gauza asko koordinatu behar dira: musika, jantziak, jendea..."

Hori ikusita, danborrada antolatzen zuen sei laguneko taldea desegin dute. Hala ere, erabaki hau ez da behin betikoa. "Egunen baten danborrada berriz egitea

Danborradaren antolatzaileak haserre daude eta oraingoz taldea desegin dute

prestatzeko gero laguntzeko prest egongo gara, baina ez dugu ezer ziurtatzen. Aurten gertatu dena berriz ez gertatzea espero dugu, eta ea hurrengoan gauzak bide onetik doazen".

Antolatzaileek barkamena eskatu nahi diete orain arte danborradan parte hartu duten herritarrei, eurak baitira egoera honen ondorioak jasan dituztenak.

De Vegak esan digunez, "antolatzaileok ez ezik herritarrek ere haserre daude. Kontuan hartu behar da horrelako herri txiki batendako sekulako ekitaldia dela danborrada. 300 lagunetik gora izaten dira bertan, eta ezer gabe geratzeak pena eman dio askori". Gaineratu digu hau gertatu ostean, ez dakiela danbor joleak beste urteren baten parte hartzeko prest egongo ote diren.

KULTURA

Arno maisuaren hipnosi saioa eta ipuin kontalariak Espaloian

I.A.

Asteburu honetan hainbat ekitaldi izango da Espaloian. Gaur, barikua, Arno maisuaren hipnosi saioa izango da. Lehenengo aldiz antolatzen du Espaloiak hipnosi saio bat eta espektatiba handiak sortu ditu. Arno maisuak barreak eta negarrak eragingo ditu ikusleek parte hartzeko saioa izango da eta sinesten errazak ez diren hainbat ariketa egingo ditu. Sarrera 10 euro da eta 8 euro bazkideendako.

IPUIN KONTALARIAK

Bestalde, domekan ipuin kontalarien saioa izango da 19:30ean hasita.

Ahokotasunaren Nazioarteko Jaialdiaren baitan antolatutako emanaldia da. Ipuinak kontatzeko ardura izango dute Kamerungo Boni Ofogok eta Mexikoko Martha Escudero.

Boni Ofogok, Kamerungo herrixka baten jaiola izanik, txikitatik jaso du ahoko tradizioa Gerora, 1992an ipuin kontalari moduan hasi zen eta gaur egun

hainbat tokitan jarduten du langintza horretan. Batik bat Afrika beltzeko kondairak kontatzen ditu Bonik.

Mexikarra da Martha Escudero, gaur egun Bartzelonan bizi dena. Hala ere, Mexikoko eta Latinoamerikako ipuinak kontatzen ditu batik bat bere emanaldietan; batzuetan musikaz lagunduta gainera.

Ipuin kontalarien emanaldirako sarrerak sei euro balio du; bazkideek, berriz, lau euro ordainduko dituzte.



Boni Ofogo ipuin kontalari Kamerundarra.

OMENALDIA

'Lepo'-ri omenaldia egin diote hil zuteneko 25. urtemugan

I.A.

Apirilaren 28an bete ziren 25 urte Xabier Arantzeta Lepo hil zutela. Haren heriotzaren 25. urtemuga gogoratzeko omenaldia egin zuten joan zen domekan Asentzión. Lepo-ren gainean bere bizitza bilduko duen liburuxka bat gertatzen ere badihardute.

Joan zen domekan Asentzión elkartu ziren hainbat lagun Jabier Arantzeta Lepo-ri omenaldia egiteko. Izan ere, orain dela 25 urte, apirilaren 28an hil zuten Hernanin.

Omenaldian txalapartariak eta bertsolariak izan ziren lehenengo. Ondoren, testu bat irakurri zuten eta dantzariak agurra dantzatu ostean lore-eskaintza egin zuten oroitarrian.

LIBURUXKA

Lepo hil zutela 25 urte bete diren honetan, bere bizitza bilduko duen liburu bat gertatzen dihardute, baina oraindik zehazteke dago noiz kaleratuko duten.



Jabier Arantzeta-oren omenez Asentzión ipinitako oroitarrian egin zuten omenaldia. MIKEL IRIZABAL

Guardia zibilaren kontrako ekintza batean txofer lana egitea egotzi eta 1976an atxilotu zuten. 80 egun eman zituen Zaragozako espetxean eta fidantzapean aske irten ostean Iparraldera egin zuen ihes. Ondoren, 1980ko apirilaren 28an hil zuten Hernanin. Asteon bete dira, beraz, 25 urte.

1944an jaioa, bederatzi seme-alaben artean bigarrena zen Jabier. Ezagutu zutenen hitzetan umore oneko gizona, broma zalea eta zirikatzailea zen oso. Pilotan jokatzeko zuen eta ehiza ere oso gustuko omen zuen.

Horiek eta beste hainbat kontu jaso nahi ditu liburuxkak.

ESKOLA TXIKIAK

Jaialdia zapatuan Espaloian Eskola Txikien Jaia girotzeko

I.A.

Eskola Txikien Jaia ekainean egingo bada ere, bihar, zapatua, festa izango da jaialdia Espaloian. Bestalde, asteon aurkeztu dituzte Eskola Txikien Jaian izango diren ekitaldiak.

Ekainean egingo da Elgetan Eskola Txikien Jaia. Aurrez, jai girotzeko, festa izango da bihar, zapatua, 19:00etan Espaloian. Sorprezaz betetako jaialdia izango da eta

umeez zein helduek hartu ahal izango dute parte. Besteak beste, Eskola Txikien Jaiko abestia aurkeztuko dute bertan.

Horretarako kantuaren egile Ainhoa Agirreazaldegia, eta abestiari musika ipini dioten Gorka Arizmendiarría, Izaskun Ojangueren, Josu Azkarate eta Loiola Madera izango dira jaialdian.

EKAINEN JAIA

Bestalde, asteon aurkeztu dituzte Eskola Txikien Jaia-aren nondik norakoak eta egunean bertan egingo diren ekintzak.

Goizean eskola txikietako ikasleek aurkezpen saioak egingo dituzte jolasen bidez.

Ondoren, pilotalekuan bazkaria izango da 350 lagunendako. Hala ere, antolatzaileek herrian beste gune batzuk egokituko dituzte norbere jatekoa ekartzeko duenak eroso bazkaltzeko.

Bazkal ostean, pailazoaren emenaldia egongo da, eta gero dantzaldia Tapia eta Leturiarekin.

Egunean zehar ohe elastikoak eta rokodromoa ere egongo dira; eta herriko trikitilariak girotuko dituzte kaleak.

EUSKARA

Hika ikasteko eskolak maiatza eta ekainean

I.A.

Hikaren gainean ikastaroa antolatu du Udalak. Ikastaroa maiatzaren 17tik ekainaren 16ra bitartean izango da, martitzenetan eta eguenetan, 20:00etatik 22:00etara Kultura etxean.

Ikastaroaren helbura da Elgeta aldeko hiketan ziurtasuna hartzea. Ikastaroko irakasle izango den Juan Martin Elexpururen esanetan, "Hika da trataera nor-

malena eta atsegina konfiantza edo lagunarte giroan. Eten barik erabiltzen du jende askok, baina ez eskolan eta ez beste inon erakusten ez denez, forma okerrak bere bidea egiten ari dira. Bestalde, jende asko dago beti zuka egin duena eta hika ere ikasi nahi duena".

Ikastaroan parte hartu nahi dutenek izena eman behar dute maiatzaren 11 baino lehen udaletxean 10 euro ordainduta.

LABUR

Elgetako euskararen gaineko hitzaldia Alberto Telleriaren eskutik maiatzaren 6an

Alberto Telleria elgetarrak herriko euskararen egoera izango du hizketarako gai liburutegian emango duen hitzaldian. Hitzaldia maiatzaren 6an izango da 19:30ean, eta edozein herritar joan daiteke bertara.

Maiatzaren 11n eta 25ean bi informatika ikastaro izango dira KZgunean

Apirilean bi ikastaro egin ostean, maiatzerako beste bi antolatu dituzte KZgunean. Lehenengoa maiatzaren 11n izango da 9:00etatik 11:00etara eta Outlook Express programa erabiltzen ikasiko dute bertaratzen direnek. Bigarrena maiatzaren 25ean egingo da Zure egunkaria irakurri izenburupean 11:00etatik-13:00etara. Izena emateko epea zabalik dago.

KIROLA

ETB KANTXA (PILOTA)

Apirilak 29
21:00: Armendariz-Irureta (23 urtez azpikoak)
Gero: Olazabal-Etxeberria (23 urtez azpikoak)
Gero: Beloso-Tabar (23 urtez azpikoak)
Gero: Bengoetxea-Urrestarazu (23 urtez azp.)

Apirilak 30
16:30: Garraja-Eskudero (Kadeteak)
Gero: Beroiz-Esparza (Kadeteak)
Gero: Tellaetxea-Saez (Kadeteak)
Gero: Iraola-Kortabarria (Kadeteak)

Maiatzak 1
10:45: Grajal-Iturria (Kadeteak)
Gero: Mendizabal-Ariznabarreta (Kadeteak)
Gero: Mitxelena-Madariaga (Kadeteak)
Gero: Vicente-García (23 urtez azpikoak)
Gero: Elurbe-Torres (23 urtez azpikoak)

Maiatzak 2

11:00: Landaburu-Bolinaga (Kadeteak)
Gero: Iribar-Lezaun (Kadeteak)
Gero: Aurtenetxe-Ibarguren (Kadeteak)
Gero: Agiriano-Zelaia (Kadeteak)
16:45: Ropon-Alberdi (Kadeteak)
Gero: Elezkano-Rico (Kadeteak)
Gero: Apeztexea-Martinez (23 urtez azp.)
Gero: Renobales-Altzagarai (23 urtez azp.)
Gero: Urrizelki-Astiz (23 urtez azp.)

ARETO FUTBOL TXAPELKETA

Apirilak 30
15:00: Makanaki-La Kokotxa Añiketan
16:00: Viclos-Añiketan Makanaki
17:00: Isspro-Txapela Fuxion
18:00: Fuxion-Maccabi Isspro

RECYDE, S.A.
Pagatza pol. ind. 20690 ELGETA, Gipuzkoa
Tel.: zentrala: 943 78 80 00. Faxa: 943 78 90 10
Posta elektronikoa: recyde@recyde.es

AENOR
ER
Enpresa Erregistratua
ER-0182/2/95
ISO 9002
QS 9000
ISO/TS 16949

Aperribay, s.l.

Marmoldegi eta granitoak

Pagatza indus. z/g.
Tel. eta faxa: 943 78 90 21

20690 ELGETA

JAR EZAZU HEMEN ZURE PUBLIZITATEA

TEL.: 943 76 92 71

Goibekokale